

Kementerian Pendidikan puji sikap pensyarah USM hadapi IR 4.0



Asma Hanim Mahmood
20 Ogos 2019 7:15 PM

KOTA BHARU 20 Ogos - Kementerian Pendidikan memuji sikap proaktif, inovatif dan kreatif yang menjadi amalan di Universiti Sains Malaysia (USM) khususnya kalangan pensyarah untuk menghadapi Revolusi Industri 4.0 (IR 4.0).

Ketua Pengarah Pendidikan Tinggi, Datin Paduka Ir. Dr. Siti Hamisah Tapsir berkata, pensyarah di USM bersikap proaktif membangunkan sendiri peralatan berteknologi tinggi yang turut boleh dikongsi dengan institusi lain biarpun dengan peruntukan yang terhad.

Beliau berkata, sejak beberapa tahun lalu, pihak kementerian berusaha dan bergerak bersama dengan universiti awam di negara ini untuk menuju IR 4.0 yang disifatkannya sebagai sebuah perjalanan.

"Ia bukan satu destinasi tapi sebuah perjalanan, teknologi sentiasa berubah, kita juga perlu berubah sama tetapi yang paling penting adalah mempunyai kemauhan untuk belajar seumur hidup, kita perlu sentiasa belajar dan juga belajar semula.

"USM kita tahu adalah sebuah universiti yang sentiasa memberi semula kepada masyarakat dan keberadaannya disedari universiti-universiti luar negara yang banyak menjalinkan kerjasama," katanya.

Beliau berkata demikian selepas merasmikan serentak Persidangan Perubatan dan Sains Kesihatan Antarabangsa (ICHMHS) Kali Ke 3 dan Persidangan Perubatan dan Sains Kesihatan Kebangsaan (NCMHS) Kali Ke 24 di sini hari ini.

Yang turut hadir, Naib Canselor USM, Prof. Datuk Dr. Asma Ismail.

Persidangan itu buat julung kalinya dianjurkan dengan kerjasama Universiti Lorraine, Perancis dan Universiti Mahasarakham, Thailand.

Hampir 400 peserta termasuk dari luar negara menghadiri persidangan yang mengangkat tema 'Kesihatan 4.0 - Dari Asas Kepada Amalan Klinikal' itu.

Ia menjadi platform untuk penyelidik dalam dan luar negara berkongsi maklumat terkini termasuklah dalam perubatan penyakit kanser dan mental, kepintaran buatan (AI) dalam perubatan dan proses penuaan serta 'big data' dalam perubatan.

Pada majlis itu juga, Naib Canselor Kolej Perubatan, Universiti Perubatan Teluk (Gulf Medical University), Emiriah Arab Bersatu (UAE), Prof. Manda Venkatramana telah menyampaikan ucaptama betajuk 'Perjalanan Menubuhkan Sebuah Model Mapan Institusi Perubatan dan Kesihatan Swasta di Teluk'. - UTUSAN ONLINE